

四庫全書

史部

欽定四庫全書

史部

浙江通志卷二百十七

詳校官給事中臣戴璐

檢討臣德生覆勘

總校官編修臣倉聖脉

校對官中書臣石鴻緒

謄錄監生臣方汝觀

欽定四庫全書

浙江通志卷二百十七

祠祀

山川百神凡有功德於民者咸列秩祀所以合幽明達誠敬也

盛朝五禮修明而於崇德報功之典為尤重焉維浙東西嶽瀆之祀典禮有加徧於羣神有舉莫廢凡以為斯民求福免災而飭紀之道亦於是乎在志祠

祀

杭州府

錢塘縣

附郭

仁和縣

附郭

先農壇

在慶春門外東郊仁和縣臨江十一畝

國朝雍正四年八月欽奉

上諭國家以民為本民以食為天朕即位以來念切民

依舉行耕藉之禮殫竭精誠為民祈穀於

上帝乃雍正二年三年耜田壺產嘉禾有至一莖九穗者
朕心亦以為偶然之事今據府尹劉於義進呈今歲
耜田所產有一莖雙穗三穗以至八穗九穗皆碩大
堅好異於常穀朕見之心甚慰悅特令宣示廷臣朕
並非以此為祥瑞誇耀於衆也蓋實有見於天人感
召之理捷於影響無纖毫之或爽朕以至誠肫懇之
心每歲躬耕耜田以重農事即蒙

上帝降鑒壺產嘉禾以昭休應似此八穗九穗之穀豈人

力之所能強為亦豈人君所能強之使有乎天人感應之理朕見之最真最切但恐此心不誠耳誠則未有不動者即如從前青海蠢動朕為邊陲憂慮虔禱於宮中不數旬而捷音即至疆宇寧謐又聞前歲夏間近畿雨澤稍愆朕在宮中默禱減膳修省虔誠叩懇不數日而甘霖大沛禾稼有秋此皆近年以來朕親行親驗之事至於去年夏秋之間時常陰雨而朕在宮中但覺雨水稍多不知其大為民患而李維鈞

並不將畿輔被潦實情具奏是以朕竟不聞知未嘗
早為虔禱殫竭誠心以挽

天意而舒民困及蔡珽署直隸總督事務詳細奏聞朕宵
旰憂勤幾廢寢食於是截漕發倉多方賑濟京城設
厰各邑興工俾窮民皆得餬口是以地方雖被水災
而小民不致流離失所朕撫綏憫惜之念實為迫切
今歲二麥豐收禾黍暢茂此皆

上天俯鑒朕衷故加惠祭元而錫以盈寧之慶也蓋天生

民而立之君鑒觀在上人君一念敬謹政事無闕天
必嘉之佑之一念放逸政事有乖天必戒之戒之此
一定之理也況人君撫馭臣庶位處極尊所以賞罰
之者獨有

上天耳是以朕每於水旱等事皆實心內省必係朕有過
失

上天儆戒示譴也至於各省旱澇之事朕皆視同一體原
無彼此之別惟是地方相隔路遠彼地偶有水旱有

司未必即行具報及至奏達朕前而緊急之時已過
是以朕無從盡其誠心為之祈禱此其責全在本省
督撫矣督撫受朕委任之重為朕養育萬民必視百
姓之疾苦如痛癢之在己身一遇水旱饑饉必思所
以致此之由或因本省之政事吏治有關即思速為
改易之或因本地之人心風俗不端即思速為化導
之兢兢業業修省祈禱竭盡誠心一如朕之朝乾夕
惕斷無不可以挽回

天意者假若聞朕之政事稍有闕失亦即直言陳奏不必
隱諱如此則官與民聯為一體臣與君又聯為一體
太和翔洽實意交享天聽雖高誠呼吸可通矣朕每
歲躬耕藉田並非崇尚虛文以為觀美實是敬天勤
民之至意禮曰天子為藉千畝諸侯百畝據此則耕
藉之禮亦可通於臣下矣朕意欲令地方守土之官
俱行耕藉之禮使之知稼穡之艱難悉農民之作苦
量天時之晴雨察地利之肥磽如此則凡為官者皆

時存重農課稼之心則凡為農者亦斷無苟安息惰之習似與養民務本之道大有裨益着九卿詳議具奏特諭欽此隨經九卿等議覆欽遵各省一體舉行創建錢塘縣知縣秦炘仁和縣知縣劉漢儒奉文共置耤田九畝八分又壇基地五畝九分零灌溉蕩一畝八分零壇制於東郊潔淨之地田在壇前壇中正祠五間左右翼七間後立寢室內供先農炎帝神農氏之神先農厲山氏之神先農后稷氏

之神祭品祭器祭儀照先師之禮每歲二月亥日
督撫主耕從耕者二員一員進鞭一員進耒外置
田畯四人以兩人扶犁兩人牽牛主耕者左手秉
耒右手執鞭九推步行盡壠而止耕畢司道及府
廳州縣次第如式耕推亦俱盡壠而止耜田之左
右四旁則令耆老農夫終其畝焉反於寢室送神
灌鬯徹祭飲福其各府州縣俱以掌印官主祭主
耕統如前式

謹按通志各門每縣分載先叙城內次及城外如山川古蹟闕梁寺觀之屬皆準此例惟祠祀一門因先農壇俱在城外最為鉅典應列諸祠之前而社稷山川諸壇凡附郭之縣皆不分設例難畫一故錢塘仁和兩縣壇廟統附於府而外屬各縣仍行分列但不分城內城外悉依時代為先後與諸門體例稍有不同以下各府倣此

社稷壇 成化杭州府志在錢塘門外西北祭以春

秋二仲上戊杭州府志明洪武三年杭州知府五

興福建於城北

舊浙江通志附郭三縣不別置餘郡縣如制

風雲雷雨山川壇 成化杭州府志在城西南包家

山春秋二仲祭奉遭城隍神主共壇合祭

舊浙江通志附

郭二縣不別置

郡厲壇 成化杭州府志在城北霍山坊內每歲春

清明日秋七月十五日冬十月一日奉城隍神以

主厲祭設無祀鬼神之位於壇下錢塘仁和以附

府不置縣厲

仁和縣志其坊隅鄉都一體置立鄉厲

先師廟

詳見學校

各府州縣同

崇聖祠

詳見學校

各府州縣同

名宦祠

詳見學校

各府州縣同

鄉賢祠

詳見學校

各府州縣同

城隍廟

咸淳臨安志舊在鳳凰山據會要為永固

廟宋紹興九年移寶月山三十年勅封保順通惠

侯

紹興三十年勅錢塘為郡尚矣雖城隍必有神主之況歲之豐凶時之水旱民之疾疫求焉

而必應者哉朕今駐蹕於此視之不異畿甸重侯美號用疏不次之封其欲其承永安兩祀可特封

保順通惠侯

成化杭州府志咸淳間加號曰輔正康濟

明德廣勝王明洪武三年正祀典詔各處府州縣

城隍止稱某府州縣城隍之神錢塘縣志永樂中

始勅封浙江故按察使周新為城隍之神成化十

年後寢火布政使甯良重建弘治十六年御史夏

景和拓新重建

揚孟瑛杭州府城隍廟記杭州為浙之名郡帶江襟海控吳扼楚方

嶽所臨為東南大都會重熙累洽安阜富蕃生聚
百萬早作夜息關柝不驚奚所庇憑惟城隍弘
治癸亥春雨暘不時蓄及田穀巡按御史夏公率
屬吏持辭香謁城隍告焉仰見棟危門圯謂茲民
主怠惰勿恭何以邀福明神乃出贖金命孟瑛經
度其事閱月功告成竊惟積上為城壁立而垣繚
居者屏倚積水為隍波回而川滙居者塹依冥漠
之中誰其尸之緬想其神受命上帝專職保民此

固百姓所宗有國者所秩祀也矧天目鳳舞吳山
馬立萬松諸峯如虎羣踞海潮西湧長江東下西
湖千頃天涵日沃抗之城抗之隍視方城漢水形
勝過之其神之威宜何如也神之威則廟之崇非
侈也宜也萬厯三十五年廟燬邑人金學曾請於制府

劉一焜倡捐重建

杭州府知府姚之蘭實董其成

張大猷為記

國朝康熙六年水師副將王虎重修易殿柱為石二十

一年按察使孟卜重建牌坊并新右司齋廳三十

六年翰林學士揆叙重新廟制又山麓別有府城

隍廟未詳創始

旗纛廟 萬厯杭州府志在太平里普濟橋東廟制
中為神宇前為櫺星門外為大門去宇東數十步
為牲房庖湑又東南為箭亭宇西為火藥庫櫺星
門之外東西皆齋宿所錢塘縣志明洪武三年建
於都司廨後八年徙建今處歲以霜降日祀軍牙
六纛之神

東嶽廟 錢塘縣志一在吳山磬如坊宋大觀中建
興忠觀淳祐間重建有理宗御書東嶽之殿四字

元李燬明嘉靖十一年重建一在中台八蟠嶺宋
咸淳中建明萬厯間尋圯

國朝康熙中重葺一在西溪法華山塢口宋南渡初建

嘉定十七年樞使史彌遠請於朝重拓寶慶三年

落成至今為杭郡嶽廟之冠

郎瑛重修法華山東嶽廟碑記泰山五嶽

之長也王者受命必告岱以祈永厯代封禪必登
記以報功是以天下皆奉而吾杭錢塘廟居三馬
一在邑中吳山一在城外八蟠嶺一在法華山法
華去城三十里人心趨向於此為最暮春三月傳
為誕辰民俗因以賽會絡繹道路者晝夜無休馬
或曰三廟獨盛於法華何也余曰昭靈貺也觀其

湧泉假夢載諸碑者詳矣自宋至今五百餘年而
廟貌益隆豈人力之所能哉今年三月余往謁廟
見一碑露日下召廟祝語之曰石久困風雨壞無
日矣曷蔽護之明日碑忽自碎衆兵驚駭或曰是
神意欲更新之也明日祝來告乞文彰之予憮然
於是述其顛末買石醵之為亭以護時嘉靖乙丑
冬至日也

廣靈廟 成化杭州府志在石塘壩宋景定四年九

月潮壞錢塘里人耆老因立東嶽溫太尉廟請於
朝賜廣靈為額咸淳五年封正佑侯餘自李將軍
以下九神皆錫侯爵李孚佑錢靈佑劉顯佑楊順

佑康安佑張廣佑岳協佑孟昭佑韋威佑

承天靈應廟 舊浙江通志在吳山城隍廟東西湖

游覽志舊為天地水府三官故俗稱三官廟宋乾
德三年建名玉虛觀端平三年重建賜今額有天
開圖畫閣清暉亭元末燬明洪武二十三年重建
梓潼帝君廟 一在吳山城隍廟之左嘉熙間蜀人
牟子才等請立廟元末燬明初重建

國朝康熙二十五年燬巡撫都御史金鉉復建一在孤

山四賢祠萬厯間南贛巡撫邑人洪瞻祖修後燬
國朝康熙間兩江總督范承勲浙江布政郎廷極重建
又貢院東有佑文祠俗稱文昌閣康熙庚午年巡
撫張鵬翮建觀橋西亦有文昌閣又雍正八年總
督臣李衛於紫陽書院山頂建文昌祠奉孤山舊
祠之像於此

太歲廟 舊浙江通志在吳山海會寺西錢塘縣志
宋紹興初建理宗書額曰至德之觀元至正間燬

行省丞相達實特穆爾重建元末又燬明天順六年重建每歲迎春奉句芒神於此

火德廟 西湖游覽志宋南渡後建於吳山以奉熒惑之神錢塘縣志明洪武中布政使王鈍永樂中叅政易晁相繼重建

國朝康熙二十五年燬巡撫金鉉重建雍正六年總督臣李衛重建舊浙江通志又教場內有火神廟鼂為顯赫仁和縣志明嘉靖丙午建

水神廟 杭州府志在寶月山明萬厯間建廟中有

金龍泉

陳學易吳山水德廟記杭會城吳山巋然南嚮相傳火形故數有鬱攸之灾堪輿家

謂宜建水神廟於癸方居天吳以制之耆民姚世明輩遂白於左方伯河東趙公叅政吳郡劉公曠地寶月山之北為畝者四甫築基忽地湧出泉極清澈蓋在高山之嶽人已異之而復一鯉躍出人更異焉遂名泉曰金龍廟面北構高樓接神面西建宇祀龍君後數步而上即湧泉在焉翼亭以覆之面南為門周圍繚以垣始作於萬厯戊戌四月落成於今年九月

龍神廟 在吳山大觀臺下

國朝雍正五年

上遣官賫送龍神像於浙

勅封福越滋農龍神巡撫臣李衛擇地創建并於廟後

建雨師風伯亭歲時祈禱必應有司崇祀惟謹

嘉澤廟 咸淳臨安志舊在錢塘門外二里號錢塘

湖龍君錢氏表請封廣潤龍王宋累封為淵靈溥

澤侯廟始梁太同中乾道五年周安撫淙以禱雨

應重建淳祐八年趙安撫與憲入建且亭其前之

井扁曰寒泉武林舊事即水仙祠有薦菡泉及亭

錢鈐廣潤龍王廟碑錢塘湖者西臨靈隱東枕府城澄千里之波瀾承諸山之源泳固有神龍居止水府司存降景祐於生靈興旱潤之風雨原其自編祀典積有歲年雖承奠酌之規未施展敬之所予遂建立殿堂表奏乞加懿號果蒙天澤並降嚴章其所奉勅旨具錄於後勅錢塘重地會稽名邦垂古今不朽之基繫生聚無疆之福有茲舊蹟特敕新規豈曰神謀實因心匠錢鈐普弱仁風久施異政至誠所切遂致感通其錢塘湖龍王廟宜賜號廣潤龍王牒至准勅旨蘇軾謝吳山水仙五龍王廟記西湖湮塞積歲之患坐閱百史熟視而嘆惟愚無知妄謂非難禱於有神陰假其便不愆於儀咸出幽贊大堤雲橫老葑席卷厯時未幾功已過半祠事告終來哲所綽神卒贊之罔弗民願有酒之報我媿不腆

玉泉龍王廟 咸淳臨安志在淨空院嘉泰初賜廟

額曰靈泉嘉定初改仁惠嘉熙四年又改神運淳

祐八年重建廟封嘉應公後加曰溥澤

詳見山川

黃龍祠 萬厯杭州府志在錢塘門外掃帚塢宋淳

祐間建以禱雨有應封靈濟侯賜祠額曰護國龍

祠明洪武七年即舊址建祠題今額

徐一夔黃龍祠記黃龍祠

在西湖北山之陰自其址斗折而上水泉紺寒深不可測旱不縮而潦不盈有龍居焉故老相傳夏雨初霽時嘗有神物蜿蜒卧於松上其氣勃勃然而黃蓋黃龍也故世號黃龍洞祠在洞側以棲龍

神宋淳祐間無門洞禪師有道行嘗說法龍興之黃龍山而歸卓錫茲山之麓見洞中嘗現光怪禱雨輒應或謂龍隨師至云時孟少保珙捐財建祠理宗封龍為靈濟侯賜額護國龍祠至正末兵燹大作龍蟄不見祠毀歲亦多歉寺僧祖吉屏居南山石屋慨然欲振無門之風詣洞祝曰祖道弗墜龍其來歸乎遂募緣興造洪武七年六月天久不雨民皆憂惶郡守相率致禱三日得大雨遂具木石屬通判王佐董其事即其故處作祠棟宇翬飛林壑改色題曰黃龍祠者從世所稱也

龍井龍王祠

咸淳臨安志在風篁嶺上旁有德威

亭

字寧宗加封誥文昔我高宗千乘萬騎嘗登南山之風篁嶺駐蹕龍秋酌泉於上一草一木咸

被昭回之光時維明神實見敬禮涓滴分泐通海挾湖寸雲出岑潤吳澤越揆以祭式宜有寵賡而

封爵未加是為闕典朕今以徹侯美稱加寵於爾
神珠宮貝闕莫窮其源華袞輪臺其永有耀奠我
都邑振爾光靈可特封

嘉應靈潤普廣澤王

南高峯龍王祠 咸淳臨安志在榮國寺後鉢盂潭
累封為孚應昭順侯咸淳五年七月安撫潛說友
以久晴禱潭上覺微雨沾衣頃之甘澍如傾乃即
故址為創廟以答靈貺

白龍王廟 咸淳臨安志在臨平東山

黑龍王廟 咸淳臨安志在超山仁和縣東北六十

里宋嘉定間趙忠獻公宰邑禱雨屢驗請於朝賜
通靈為額累封通靈惠應宣濟昭惠侯

白澤大王廟 杭州府志在純禮坊宋景德年間遣
中尉梁元帥專督漕運行至海中有猛獸號白澤
者出沒海中洪濤陡作運船幾覆忽見空中一人
乘龍馬揮鞭驅逐白澤趨服洪濤頓息糧運以全
因建祠祀之後奏請勅封土神

順濟聖妃廟 成化杭州府志在艮山門外艮山有

祠自商份感夢始開禧寶慶一再創建又有別祠

在候潮門外蕭公橋

丁伯桂艮山順濟聖妃廟記
神莆陽湄州林氏少女能言

人禍福歿廟祀之號通賢神女或曰龍女也莆臨
海有堆元祐丙寅夜現光氣環堆之人一夕同夢
曰我湄州神女也宜館我於是有祠曰聖堆宣和
壬寅給事路公允迪載書使高麗中流震風八舟
沉溺獨公所乘神降於檣遂獲安濟明年奏於朝
賜廟額曰順濟紹興丙子以郊典封靈惠夫人迨
年江口又有祠祠立二年海寇憑陵效靈空中風
拏而去州上其事加封昭應其年白湖章邵一夕
夢神指為祠處丞相陳公俊卿乃以地券奉神立
祠於是白湖又有祠時疫神降曰去湖丈許脉有
甘泉我為郡民續命於天飲斯泉者立痊掘泥坎
甘泉湧出請者絡繹朝飲夕愈麓為井號聖泉邵

以聞加封崇福越十有九載福興都巡檢使姜特立捕寇遙禱響應上其事加封善利淳熙甲辰民苗葛侯郭禱之丁未旱朱侯端學禱之庚戌夏旱趙侯彥勵禱之隨禱隨答累具狀聞於兩制易爵以妃號惠靈慶元四年加助順之號嘉定元年加顯衛十年加英烈神之祠不獨盛於莆閩廣江浙淮甸皆祠也艮山之祠舊傳監丞商公份尉崇德日感夢而建

國朝康熙十九年封天妃為護國庇民妙靈昭應弘仁普濟天妃遣禮部司官致祭

天后宮 在武林門內城東北隅

國朝雍正九年總督臣李衛毀西洋天主堂改建李衛改天

主堂為天后宮碑記自明季萬厯間大西洋利瑪竇入中國造為天主之名而其教遂蔓延於愚夫愚婦之口其徒之入中國者遂大興土木營建居室於通都大邑之中我

朝定鼎以來

聖祖仁皇帝念其人生長海外遠來就化雖為說不經然

皆具心思知識未必不可教導居之京師使沐浴聖朝德化之盛久而懽然改悔歸以教其國中之人咸知天經地義之正此乾坤覆載之深恩不遺一物之義也豈知荒誕狂悖之見固結而不可解我

皇上御極之初洞燭其奸黜其人皆歸南嶼不得盤踞內地而直省之所為天主堂者以次而改顧其制皆崇隆巍煥非編戶之所可居空之又日就傾圮去荒誕狂悖之教而移以奉有功德於蒼生之神不勞力而功成不煩費而事集此余今日改武林天主堂為天后宮之舉也雖然自利瑪竇之入

中國迄今幾二百年浸淫沉溺惑其教者未必一
旦豁然有悟即悟矣或以為不妨存而不論以見
天地之大無所不有是其得罪於天而為害於人
心風俗者卒未大白於天下也余既深知而不申
其罪無以服附和之心不誅其心無以破奸詭之
膽夫教稱天主是風雲雷雨陰陽寒暑彼皆得而
主持之也不知未有天主之前將竟無有陰陽寒
暑風雲雷雨乎抑別有主持之者俟天主出而授
之柄乎此其謬一也入其教者必先將本人祖宗
父母神脾送與燬棄以示歸教之誠不知天主生
於空桑乎抑亦由祖宗父母而生也彼縱生於空
桑亦不得率天下之人而盡棄其水源木本之誼
況入之所以敬天奉天者以天實能生人生物耳
今以生我之父母祖宗而棄絕之不知尚何取於
生人生物之天而敬之奉之此其謬二也棄絕父
母祖宗者欲專其敬於天主也然聞西洋之俗亦

有君臣有兄弟朋友且生生而不絕則何不盡舉而廢之而所以事天主者尤專且篤而獨父母祖宗彙若敝屣此其謬三也西洋之教一技一能務窮思力索精其藝而後止設所得止及於半而死則舉而授之其子脫其子猶有未就則復舉而授之其孫或一傳或三四傳其藝始精則羣然推而奉之以為此可以行教之人矣今之人中國者悉此類也夫一段一能原無當於生人日用之重至於奇技淫巧尤為王法所不容今既不知有祖宗父母則為其祖宗父母者當亦不復以子孫視之獨至奇技淫巧之事父忽念其為子而不啻箕裘之授子忽念其為父而不啻堂構之承此其謬四也藝既精矣遂可出而設教行道矣夫既祖宗父母之盡彙其他漠不相識之人復何關欣戚而必窮數世之精力以利他人之用此其謬五也然此雖足為人心風俗之害而弊止及於惑其教之人

其罪猶小若其居心之險則尤有大不可問者西洋去中國數千萬里而遙非經歲不得達又有大海風濤之險去故鄉離妻子跋涉而來以人情論必有所利而為之故攜帶土物造作器用其誑中國之金錢誠不可數計乃聞入其教者必有所資給人有定數歲有定額勞心焦思取中國之財而仍給之中國之人圖利者恐不若是之拙也或云每年紅毛船到必廣載其國中之金錢以濟其在中國行教之人或又云彼來中國者皆善黃白之術以彼國之金錢而用之中國夫以此數人之行者非利也彼既以天主之教惑人而復借黃白之術以要結人心是其設心殆有在矣或又為之說曰彼其志欲行教耳好名之人能讓千乘之國何難去故鄉離妻子蹈不測之大海以博後世之名夫好名之人或有捨其身以徇人者然一人好名

何為盡一國之人亦皆好名而傾貲以佐之也且
絡繹而來其居天主堂者所在而有抑何好名者
之多也此蓋非無所為而為之者一見其技於噶
爾巴矣再見其技於呂宋矣又幾肆其技於日本
矣為行教計耶抑不為行教計耶且愚夫愚婦未
有不以禍福動其心者今日本於海口收港登陸
之處鑄銅為天主跪像抵其國者不蹈天主像則
罪至不赦夫既為天主之主而受海外一國如此蹂
踐毀蔑卒亦無如之何其不能禍福人明矣所精
者儀器而璿璣玉衡見之唐虞矣所重者日表而
指南車周公曾為之矣所奇者自鳴鐘銅壺滴漏
而漢時蚩有之矣所駭人者機巧而木牛流馬諸
葛武侯已行之鬼工之奇五代時亦有之至今尚
有流傳之者是其說不經其所製作亦中國之所
素有其為術又不能禍福人吾不知何為而人之
惑之也西洋人之居武林者

聖祖仁皇帝曾有白金二百兩之賜此不過念其遠來而

撫恤之彼遂建堂於此而顏其額曰勅建夫曰勅

建必奉

特旨建造今以曾受賜金遂冒竊勅建之名內外臣工

受白金之賜者多矣以之築室遂可稱賜第乎干

國憲而冒王章莫此為甚他復何可勝道耶荒誕

狂悖者宜去則有功德於人者宜祠也冒竊勅建

之名者宜毀則列在祀典者宜增也天后之神姓

氏顛末見於記載者雖亦未可盡信然我朝

聖聖相傳海外諸國獻琛受朔者重譯而至魚鹽商賈出

入於鷺濤駭浪之中計日而出尅期而還如行江

河港汊之間而天后之神實司其職神之靈應呼

吸可通功德之及民何其盛哉誕罔不經者去而

崇德報功之典興毀其居室之違制者改為祠宇

撤其像望之詭秘者設以莊嚴夫而後武林之人

目不見天主之居耳不聞天主之名異端邪說久

且漸熄其有闕於
風化豈淺鮮哉

雍正十一年八月禮部議覆福

建總督郝玉麟條奏各省城建天妃祠宇一例春

秋致祭奉

旨依議

五顯靈官廟

舊浙江通志在五雲山之巔山最高

神靈顯異相傳九月二十八日為神誕辰藝香者

滿山谷北高峯亦有五顯廟神亦最靈

東嘉忠靖王廟

旌德觀志王姓溫氏諱瓊字永清

號子玉溫之平陽人初封地祇主令翊靈昭武將
軍正佑侯嗣封正福顯應威烈忠靖王則宋李之
累加也舊廟祀浙之溫郡其祀於錢塘則自宋寶
慶二年始時灾厲盛行有司迎王禳除患立已杭
人德王將導迎還郡舁夫百像弗為動遷人謂王
顧歆斯土府尹袁韶奏請於朝初立觀於杭之蘇
堤後徙建於城之東保安坊南良里額曰旌德昭
王仁也

國朝雍正八年重修總督臣李衛題梁

旌德先賢祠 舊浙江通志在錢塘保安坊祀唐許

由以下百九十九人每歲額支仁和縣學租銀五
兩致祭表貞祠在先賢祠右祀漢曹娥以下列女
九十七人每歲額支錢塘縣學租銀四兩致祭

謹按宋袁韶初祀三十四人明夏時正去其不當
祀者五人共二十九人唐許由漢嚴光吳淩統晉
范平褚陶孫啓宋卜天與范叔孫褚伯玉顧歡杜
京產梁范元琰褚修唐褚無量許遠章成綱宋錢
徽即簡林通謝錢彥遠錢藻沈道陸詵錢鰓虞
奕吳思禮崔貢張九成又增祀一十九人宋吳師

仁勝茂實施德操楊由義李執楊璿余古李宗勉
俞烈趙汝談葉時洪咨夔朱清謝翱元吾衍楊載
陳斗龍鄒世聞明王琦以上四十八人見萬厯志
萬厯三年又增祀唐褚遂良後梁錢鏐明于謙項
麒陳鏞夏時正孟春施魯褚銳李璣衡等十人萬
厯二十九年又增祀吳伍員唐顏真卿宋唐介李
綱岳飛明張翱鄒虞胡世寧陳荆獻江曜許應元
許貫之童漢臣張瀚翁相張椿陳善高儀江沂朱
熾錢立鍾化民等二十二人俱見馬三才宋應昌
碑記天啟四年李唐又請增祀宋徐應鑣明夏誠
高暉鄒幹江珙朱鏞吳誠洪鍾金洪江濶丁養浩
李旻陳珂江曉許相卿陳克昌方九叙張淦姚良
弼吳源沈詔茅瓚陳洪濛楊周邵大章顧言孫本
凌立郭孝孫枝郭維垣朱印李逢春許三省嚴大
紀黃裳顧鈴宋應昌楊兆坊沈文許子良沈楠江
鐸陳禹謨馮夢補凌登名陳洽沈瑞臨方可立顧

汝學凌登瀛陳植槐張鳴鶚許仲譽錢養廉陳植
棹姚文蔚黃克諫翁汝遇林遇春汪有功朱履巖
子茂沈守正胡引嘉郭金科六十六人又徐子方
何琮陳學易張濂馬三才孔承祀柴祥林梓潘頤
龍黃應奎徐桐王化黃思道高從禮毛偉沈光祚
翁常豫十七人

國朝康熙十二年錢塘令梁允植詳請增祀名宦唐李
泌白居易駱賓王羅隱宋蘇軾朱弁王庶朱蹕明
王良聶心湯顧咸建

國朝范承謨鄉賢唐陸贄宋趙抃宗澤王十朋陳禾呂
祖謙趙希瑄徐復元金履祥許謙明方孝孺鄭濂
鄭湜柴車魏驥夏時倪岳商輅王守仁孫燧王世
名陶大臨李唐黃汝亨李中華李中楫倪元璐施
邦曜凌義渠周鳳翔吳麟徵陳良謨吳甘來王道
焜陸培陳潛夫劉宗周祁彪佳丘寅

國朝王佑賢五十二人俱見杭州府志又增祀姓名有

府志未載者宋袁詔明潘翊許應亨諸允修諸燮國朝張存仁王一麟周瞻此呂蘭顧懋樊顧景祚許昭遠王法平王修玉謝重輪金世臣等十六人俱見旌德觀志

宗聖曾子祠 錢塘縣志在通江橋河下其後裔曾

開因宋南遷扈蹕至杭遂立祠奉祀

柳洲二賢祠 錢塘縣志在柳洲亭左舊名子貢使

越祠祀先賢端木子

國朝康熙二十六年巡撫金鉉督學周清原從先賢仲子後裔之請以舊先賢仲子祠在弼教坊者廢合

祀於此遂改今名雍正九年杭州府知府秦烱重修

英衛公廟 咸淳臨安志忠清廟在吳山神伍氏名

員字子胥吳王夫差入越句踐使大夫種行成於吳王許之子胥諫不聽賜之屬鏹以死吳人憐之為立祠江上名曰胥山唐元和十年刺史盧元輔

修

盧元輔胥山祠銘元和十年冬十月朝散大夫使持節杭州諸軍事杭州刺史上柱國盧元輔

視事三歲塵天子書上畏羣靈下懃烝人乃啟宗祠銘而序曰維唐敎祀典於天下廢淫置明資父

事君罔有不舉寢廟既設我命厥新有周行人伍
公字子胥陪吳之職得死直言國人求忠者之屍
荷水星之舍將瞰鵠革遂臨浙江千五百年廟貌
不改漢史遷曰胥山今云青山者謬也吁善父為
孝記曰父讐不與共戴天諫君為忠經曰諸侯有
諍臣不失國當阬於宋鄭絕楚出疆在平為未宦
臣在奢為既壯子坎墮仗節乞師於吳軍鼓丁寧
五戰至郢鞭墓走昭非逆施也夫差既王宰嚭受
賂二十年內越祀又餽秦伯廟血將乾闔閭劍光
先失公入則諫焉雖言屢出口而車甲已困於齊
矣蟹稻已奪於歲矣屬鏐之賜竟及其身鵠夷咸
屍投於水濱憤悱鼓怒配濤作神迄今一日再至
來也海鷗羣飛陽侯夾從聲遠而近聲近而遠奮
於吳怫於越洊於楚乃退於是仲秋闕望杭人以
旗鼓逐之笳簫和之百城聚觀大摧威靈捲沙墨
裂地灰截若岸圻城坑迎潮氏格之如呂梁丈人

為靈戈威矛激浪百里渚塞不先跳檣獨舫再飯
之間絕其音聲蕩潏千里洪波底平有滑有脰有
鹹有腥遙實乎下庭山海梯航難林扶桑交臂於
茆階金狄在戶雷鼓在堂魏罇漢豆六代笙簧可
謂奉天爵之馨香獲神人之盛禮佐皇震怒驅叱
大邪萬里永清人觀斗氣銘曰武王鉞紂子胥鞭
平為人為父十死一生矯矯伍員執弓挾矢仗其
寶劍以謁吳子稽首楚罪皆中紂理蒸報子妻殲
鉏直士赫赫王閭實聽奇謀錫之金鼓以號以誅
黃旗大舉右廣皆誅戮墓非楮瞻昭乃烏後王嗣
立執書不泣顏越言潤宰嚭纔輯步光欲飛姑蘇
待執吾則切諫抉眼不入投於河上自統波濤晝
夜兩至懷沙頽騷洗滌南北簸蕩東西夷蠻卉服
罔敢不來雖非命祀不讓瀆濟帝帝王王代代明
明表我
忠哉

景福二年封廣惠侯宋大中祥符五年海

潮大湓衝激州城詔本州每歲春秋醮祭賜忠清
廟額封英烈王九年馬亮知杭州禱祠下明日潮
殺又出橫沙數里隄岸乃成政和六年加封威顯
廟燬於建炎兵火興於紹興二十二年至三十年
加封忠壯乾道五年周安撫淙重修嘉定十七年
累封為忠武英烈威德顯聖王紹定四年再燬賜
緡錢重建嘉熙三年趙安撫與權又易而新之杭
州府志俗名伍公廟元改封順祐忠孝威德顯聖

王明正統十四年重修萬厯八年重建

羅隱胥山廟詩市簫

聲咽跡崎嶇雪恥酬恩此大夫
霸王兩亡時亦異不知魂魄更
歸無玉禹偁忠清廟詩朝驅下
越坂夕照當吳門停車訪古蹟
霽霽林烟昏青山海上來勢若
遊龍奔星臨斗牛域氣與東南
吞九折排怒濤吐吸天地根落
日見海色長風捲浮雲山椒戴
遺祠興廢今猶存殘香弔木客
倒樹哀清猿我來久沈抱重此
英烈魂吁嗟屬鑲鋒冥爾國士
冤峨峨姑蘇臺棘榛曉露繁深
居麋鹿遊此事誰能論因之毛
髮豎葉落秋紛紛

國朝雍正三年

勅封英衛公其廟宇動正項錢糧修理每歲春秋二祭

忠節祠 嘉靖浙江通志在寶月山下祀吳行人伍
員唐僕射褚遂良宋少保岳飛明太傅于謙歲以
八月十五日致祭

申將軍廟 成化杭州府志在臨平斗門橋北三十
步今廟有殘碑宋季人撰謂為申包胥鄉人於此
祈禱多應

謹按咸淳志云父老相傳將軍謂楚申明父白公
亂楚王命明伐之白公殺其父後人為立祠二說
未知孰是

嘉濟廟 錢塘縣志一名江東廟在吳山祀秦贛人
石固宋累封王爵賜今廟額初在崇福里繼徙貢
水之東雷崗故又名江東明隆慶三年建

蕭鄴侯祠 西湖游覽志在弼教坊奉漢蕭何宋時
廟在汴京南渡後建廟於此

周絳侯廟 咸淳臨安志在臨平鎮晉建武元年侯
裔孫卓卜居臨平即其地祠侯宋建炎中金人犯
杭居人為柵環廟以守仰視旌旗蔽空書曰漢絳

侯周勃皆羅拜而去自是靈異著聞有禱必應

顯忠廟 西湖游覽志在長生老人橋西奉漢大將

軍霍光俗稱霍使君廟

葉森顯忠廟記杭之清湖開元宮西有廟曰顯忠土

人稱霍使君祠漢大將軍博陸侯也按舊志云吳孫皓時神降于庭自言漢霍光求立祠於金山之鹹場以捍水患宋紹興初建行廟於錢塘之長生橋嘉泰紹定間兩有反風城火之應紀事傳信廟碑具存元統初夏六月火焦土者萬有餘區民窘急望廟以呼颶風速轉於是杭之士民聚金葺廟以答明貺

蕭王廟 在斯如坊三蜀候潮門內祀漢太傅蕭望

之

國朝雍正七年總督

臣

李衛捐修題曰萬姓瞻仰

蔣祝闕內

侯蕭太傅贊乾坤正氣萃於蘭陵沉淪經義禮服
一燈霍氏專政不阿守正遇主累遭極諫靡隱出
為守相化洽平原功高馮翊子惠元元輸粟贖辜
壞法不小大言炎炎氣誓京兆和親非計懾服烏
孫北藩客禮柔遠彌殷顧命欽承忠貞千古扶進
犀英以道奄豎賢傅孤立衆口鑠金弘恭石顯虺
蜴為心貝錦中傷金吾迫促和藥自裁義不受辱
鞠躬盡瘁歿為明神禦災捍患廟貌維新遺像式
瞻景行仰止敢申
贊辭神其鑒此

兩浙名賢祠 萬厯杭州府志在西湖孤山之陽祀

漢嚴光唐陸贄宋林逋趙抃王十朋呂祖謙張九成楊簡明宋濂王琦章懋陳選皆浙產也隆慶六年巡按御史謝廷傑即陸宣公舊祠改祀而徙宣

公像於祠前之恩綸閣

陳洪濛兩浙名賢祠記自昔兩浙名賢以德以功與

春秋祀載在常典者亦畧備矣然皆各崇於鄉未有包挾衆美撮其英標萃然俎豆於一堂者也隆慶壬申侍御豫章虬峯謝公來按茲壤乃詳覈省志尚論先哲於漢得一人焉曰嚴子陵於唐得一人焉曰陸敬輿於宋得六人焉曰林君復曰趙聞道曰王龜齡曰呂伯恭曰張子韶曰楊敬仲於我明得四人焉曰宋景濂曰王文純曰章德懋曰陳仕賢爰即西湖之陽宣公舊祠增立几筵等其世

次位之不以爵舉者示崇德也標其姓氏仍曰先生者示後學知所宗也祠有山田蕩若干有司領之歲時供祀不以煩民者欲其久也

諸葛明王廟 舊浙江通志在官園路神為武侯

關帝廟 錢塘縣志祀漢關壯繆侯宋崇寧元年進封忠惠公大觀二年加封武安王南渡建炎淳熙間復累加王號明萬歷十八年封三界伏魔大帝杭城廟祀極盛一在孤山名照膽臺向貯玉篆一文曰漢壽亭侯印一在跨虹橋北岳王墳左萬歷

十五年建一對錢塘門月城內萬厯二十六年建清波候潮兩門月城內亦皆有廟一在吳山通元觀一在布政司前一在城北隅一在佑聖觀內一在靈應觀側一在義和坊相傳為神祖廟宋嘉定間建一在千步廊一在萬安橋有東西二廟

國朝雍正三年四月

勅封關帝三代公爵曾祖光昭公祖裕昌公父成忠公其禮儀俱照先師廟每歲春秋并五月十三日致

祭祠以太牢各府州縣俱如制

糜相公廟 杭州府志在艮山門南神姓糜諱竺事

昭烈為安漢將軍

崇善廟 杭州府志在城北皋亭山

鮑黻崇善廟記
神姓陳氏諱頊

宇行蒿會稽人也事東晉歷青揚荆廣四州刺史
以武功食錢唐海鹽鹽官三邑見於李宗諤之圖
經者如此梁大同二年勅封興善王後改封崇善
王而失其時代歲月其見於系衍之圖經者如此
隋僧真觀滿於衆安寺夜夢神求受淨戒仍捨廟
屋五間為佛殿見於高僧傳者又如此爾後遂寢
血食專供伊蒲塞饌見於白居易之祝詞者又如
此碑版載神之事為多而怪誕不經適足以誣神

今特撫其可書者以
傳信於天下後世云

葛仙翁祠 舊浙江通志在葛嶺相傳晉葛洪煉丹
之處

顯祐廟 萬厯杭州府志在蕩百萬倉西祀隋司徒
陳果仁果仁晉陵人沈法興忌其威名召食毒死
之忠憤赫奕竟以神矢斃法興唐武德初嘉其功
封忠烈公後梁封福順武德王後周加帝號咸淳
臨安志嘉泰六年臨安以禱雨應乞加封賜行廟

額曰顯祐

沿說友顯祐行廟祝文惟王發迹於陽美而聲靈被於隣封立廟於隋唐而祀

典迨於我宋說友比以初交奉朝旨謁行祠申虔
荷戴繇習荅預告太平無言不酌厥靈益顯說友
亦既刊石以昭不朽近常之士民介郡守言王功
適印於心乃述顛末亟聞於上於是易帝號以正
季代之謬仍王爵以表大神之忠誥綸來下恩光
炳如謹已遣吏緘詞馳送廟下惟行祠在邇一併
薦聞王其益庇郡民祇荅上
賜則民事王亦永永無覈

汪王廟 杭州府志在吳山大觀臺之麓王諱華唐

高祖時以保障有功封越國稱王使持節欽宣杭

睦婺饒六州諸軍事明洪武間封廣濟惠王

白馬廟 成化杭州府志在鳳山門裏州橋之北宋
建炎間建祀磁州都土地崔府君世傳渡康王者
即此

謹按神姓崔名珏字子玉
唐貞觀間徵為滄陽令

昭忠祠 萬厯杭州府志在仁和縣忠清里祀唐右
僕射褚遂良里為遂良故居舊有祠鄉人歲祀之

成化十三年郡人周璟請於朝詔有司新其廟宇
入祀典

朱鏞
為記

又遂良九世孫名載者行學表於鄉

歿後屢著顯靈立廟曰通聖

國朝雍正八年總督

臣

李衛重修昭忠祠

東平忠靖王廟 嘉靖浙江通志在南壁秀義坊祀
唐揚州大都督張巡巡故有廟在汴宋南渡初凡
汴之有廟者皆得徙祀於杭因祀巡於此王鈍忠
靖王廟記明洪武三十年里人吳興捐資重新

千勝將軍廟

仁和縣志在新橋神為張亞夫

何敬千勝

廟記新橋樓千勝將軍唐御史中丞張巡子亞夫也神父守睢陽力屈而死詔贈揚州大都督奏贈

中國夫人是時神尚幼拜金吾大將軍神將家子
故人以千勝稱云宋都汴有廟祀巡神實附之南
渡後將遷神為別祀以新安橋當閭閻之衝據高
爽之地專祀以安神像咸淳十年褒封神亭侯加
福德二字
昭靈貺也

陸宣公祠 杭州府志在孤山之陽祀唐忠宣公陸

贄

西湖游覽志祠乃中書舍人洪澄別墅後屬陸炳炳自謂系出宣公祠祠祀之規制宏敞吞吐

湖山臺榭之盛為一時冠

國朝雍正九年裔孫陸琨等重修總督

臣

李衛建坊題

曰湖山增勝又書額於祠曰以道事君復為撰記

嘉澤廟 成化杭州府志俗呼西井寺在湧金門北
城下祀唐鄴侯李泌宋嘉定中賜廟額嘉澤萬厯
杭州府志又祠在西壁坊名李鄴侯祠

四賢祠 萬厯杭州府志在孤山之陽祀唐李泌白
居易宋林逋蘇軾萬厯杭州府志初杭人祀白公
於竹閣後增林蘇二公因名三賢堂紹興後廢府
尹周淙徙寄水仙王廟廡後尹袁韶徙建廢花塢
元廉訪使徐琰祀於西湖書院明天順間知府胡

濬復建今處正德元年知府楊孟瑛增祀李鄴侯

再易今祠祀以春秋

楊孟瑛四賢祠記孟瑛守杭郡三年於今還往孤山見三

賢祠棟撓梁壞懼神之不棲而羞吏之不恭也竊惟逋仙風節山崇湖深名教攸繫白文公蘇東

坡皆杭賢守石函一封時泄時鍾葑洲既闢千頃一碧兩邑之田殘溝斷沍莫非遺澤民到於今賴

之又唐鄴侯李公泌亦嘗刺是州穿六井引湖波民始不食鹽苦雖功不在湖而以湖為功與白公

蘇公埭曷作新廟而合祀之更稱四賢祠仰惟三公治杭事有美蹟人有道愛率應祭法六井一湖

才一事耳然杭人祀文公必於孤山祀鄴侯必於湧金北城祀東坡必於湖堤鎖澗之橋豈政以時

易易則不傳愛與澤流流故終不可謾也今孤山之祀與北城湖橋既廢故因文公之舊而合祀於

是至於推祀逋仙則宋秦
定間即有之蓋義起也

潮王廟

仁和縣志在芳林鄉神為唐石瑰

僧本誠潮王廟

記按晏殊輿地志古有石姥祠舊碣載石姓瑰名
生於唐長慶三年錢塘古稱濤江民苦潮害王奮
力築堤以捍水勢祁寒劇暑不輟功未就竟死於
潮後為神咸通中官為立廟封潮王宋宣和間睦
寇犯順時朝迂以韓世忠禦敵陰雲四合聞空中
叱咤聲仰見旗幟書石姥潮王之號軍士奮勇大
破寇兵嘉熙間潮水復作潰堤衝岸漂蕩民居人
力不能禦京尹趙公與憲躬禱祠下潮復故道有
司上其事加封忠惠顯德王皇慶二年
主僧宗禮率其徒即寺創毘盧閣廟之

廣惠廟

萬厯杭州府志在錢塘門外霍山宋乾道

中建祀唐僕射張渤

趙師白廣惠廟記霍山廟者廣德張王之別祠也王以休

功顯德敷佑生民歷代罔不優禮褒崇暨我朝慶
厯追錫之命增加王號極其榮美粵自開迹祠山
肇興廟食有禱於王旋於磐谷光靈之迹旁加橫
掖於是離宮行廟金碧丹雘連城跨郡宮堯相望
焉仰惟帝城四方之極百神受職是翼是衛矧王
之神游所止密拱京甸衆大之區并蒙祉福顧獨
未有揭虔安靈之地不其闕歟乾道庚寅始卜地
於霍山哀金鳩工營建棟宇規模位置煥然鼎新
廟成於紹興甲寅正月二日為費錢
十萬而判院張宗况施助獨多焉

錢王祠

嘉靖浙江通志在湧金門外祀吳越錢武

肅王鏐宋時名表忠觀在妙因山歲久湮廢咸淳

臨安志表忠觀在錢湖門外方家峪寶藏寺左錢

氏五王皆祠焉

蘇軾表忠觀碑熙寧十年十月戊子資政殿大學士右諫議大夫知

杭州軍州事臣抃言故吳越國王錢氏墳廟及其祖父妃夫人子孫之墳在錢塘者二十有六在臨安者十有一皆蕪廢不治父老過之有流涕者謹按故武肅王鏐始以鄉兵破走黃巢名聞江淮復以八都兵討劉漢宏并越州以奉董昌而自居於杭及昌以越叛則誅昌而并越盡有浙東西之地傳其子文穆王元瓘至其孫忠獻王仁佐遂破李景兵取福州而仁佐之弟忠懿王俶又大出兵攻景以迎周世宗之師其後卒以其國入觀三世四王與五代相終始天下大亂豪傑蜂起方是時以數州之地盜名字者不可勝數既覆其族延及於無辜之民罔有孑遺而吳越地方千里帶甲十

萬鑄山煮海象犀珠玉之富甲於天下燕終不失
臣節肯獻相望於道是以其民至於老死不識兵
革四時嬉遊歌舞之聲相聞至於今不廢其有德
於斯民甚厚皇宋受命四方階亂以次削平西蜀
江南負其險遠兵至城下力屈勢窮然後束手而
河東劉氏百戰守死以抗王師積骸為城灑血為
池竭天下之力僅乃克之獨吳越不待告命封府
庫籍郡縣請吏於朝視去其國如去傳舍其有功
於朝廷甚大昔竇融以太牢今錢氏功德殆過於
融而未及百年墳廟不治行道傷嗟甚非所以勸
獎忠臣慰荅民心之義也臣願以龍山廢佛祠曰
妙因院者為觀使錢氏之孫為道士曰自然者居
之凡墳廟之在錢塘者以付自然其在臨安者以
付其縣之淨土寺僧道微各度其徒一人使世掌
之藉其地之所入以時修其祠宇封植其草木有

不治者勝令丞察之甚者易其人庶幾永終不墜
以稱朝廷優恤錢氏之意臣抃昧死以聞制曰可
其妙因院改賜名曰表忠觀銘曰天目之山苔水
出馬龍飛鳳舞萃於臨安篤生異人絕類離羣奮
挺大呼從者如雲仰天視江月星晦矇強弩射潮
江海為東殺宏誅昌奄有吳越金券玉冊虎符龍
節大城其居包絡山川左江右湖控引島蠻歲時
歸休以燕父老華如神人玉帶裘馬四十一年寅
畏小心厥篚相望大貝南金五朝昏亂閭閻托國
三王相承以待有德既獲所歸弗謀弗咨先王之
志我維行之天祚忠孝世有爵邑允文允武子孫
千億帝謂守臣治其祠墳毋俾焦牧愧其後昆龍
山之陽歸焉新宮匪私於錢維以勸忠非
忠無若非孝無親凡百有位視此刻文

萬厯杭

州府志嘉靖三十九年以靈芝寺改建

陳柯改建
錢王祠碑

記予少讀蘇子瞻表忠碑記慨然念錢王於吳越之民其德厚矣予繆守茲土督撫梅林胡公等改祠於靈芝寺寺蓋王故苑也幸襄厥成予又病東坡手碑殘剝也為易石摹刻之以置諸斯祠使謁王祠者讀茲文以思王德庶幾斯祠斯文相與傳千百世於無窮也

國朝康熙四十四年

聖祖仁皇帝南巡

御書保障江山四字額敬摹勒石祠內雍正三年

勅封誠應武肅王五年總督臣李衛重建委經歷張彥

珩監修

李衛重修錢王祠碑記士君子苟有介節孤芳振拔流俗即可以叨祠祀況生平功

業實能仰荅一人俯護萬姓則春秋殷薦雖千百
載猶當世享之浙有武肅王封自梁唐相沿矣葉
其功與德在史冊衆志既詳哉言之矣厥後褒嘉
忠悃爰建祠於東陽又正表忠觀於西湖之濱凡
武林士民且祈且報累累勿絕亦足以見惠澤所
被衆深且遠也雍正丁未歲我

皇上嘉其靈爽

勅封誠應而蕩觀傾圯殊不足以肅瞻仰因令剋期修
建以底厥成夫事之廢興成毀相尋無窮宋以妙
因院佛寺改奉為觀而興在熙寧者旋又廢諸明
代嘉靖中再卜地於錢王故苑而是觀復立遂塑
王像并子文穆孫忠獻忠遜忠懿諸王俱附之迨
嘉靖迄今又數百年而故址頽垣幾於再廢矣自
有此建庶幾望其門其靈斯在謁其像其神乃依
是又足以廓宋元明之宇而蕩典聿新也是役也
始於丁未十一月迄戊申八月竣事觀傍西湖由

御碑

湖而上則有階厯階而進則有坊有亭以奉

御碑有橋以駕碧沼有門二重有殿有樓殿供王像樓

供王得姓之祖商賢大夫循舊制也前後有牆東西有廊其間魚鱗鳳集藻井綺疏無不照灼而選材堅固則又足以為久遠之計從此宰茲土者加意保護俾爾軍民勿輕褻越則是祠廟貌其與錢王之德而俱永歟

錢文穆王祠

吳越備史天福七年十二月以龍山

武功堂為文穆王廟

履泰將軍廟

杭州府志在西湖金沙港祀吳越時

孫顯忠武林舊事將軍錢塘人仕吳越嘉熙中趙

與懽尹京禱雨有驗奏聞封天澤侯額曰勅賜孚

應之廟

喻均重建天澤廟記履泰將軍廟隸錢塘之金沙港去郭十五里許地故僻不屬通

衢而廟隘僅數椽頽垣敗瓦隱約桑柘間罔有過而禮者萬厯癸未夏太守張公振之始撤而新之前為廟門中為殿後為寢殿之左為井井之前為臺寢之後為池窅然幽以深將軍故以天澤侯封池所以象澤從陰氣也

金華將軍廟 萬厯杭州府志在湧金門內十國春

秋曹杲真定人文穆王時官婺州刺史忠懿王朝

宋杲鎮撫國中即城隅浚三池引湖水入城以通

舟楫王歸嘉其功賜池名曰湧金立石池上卒後
見神於豐豫門有反風滅火之異土人立祠肖像
迄今歲祀不絕

昭節廟 萬厯杭州府志在保安坊後周時有喬亢
陸軌者仕為殿侍東第三班宋太祖受禪二人守
宣祐門拒弗納既乃自他門入二人死之太祖以
為忠聽本班廟祀南渡後立廟吳山寶祐三年賜
額景定中凡三封侯爵

靈惠廟 成化杭州府志在孝女北管下墟神姓謝
諱達字明遠歿而顯靈宋建炎初金人犯境忽聞
空中金鼓聲旌旗振耀顯露謝公神號金人遂遁
鄉民賴焉隣境屢有虎豹不入其境咸淳庚子元
夕鄉人夢神云今歲當大旱宜先開井濬源夏秋
果旱賴井灌田成熟自後旱潦祈禱輒應事聞賜
額

昭貺廟 咸淳臨安志在候潮門內渾水閘東故司

封郎官張夏祠四朝聞見錄杭州江岸率多薪土
潮水衝擊不過三歲輒壞夏令作石堤一十二里
以防江潮既成杭人德之慶厯中立廟於堤上嘉
祐十年又因功贈太常少卿政和二年八月封寧

江侯改封安濟公併賜額曰昭貺

七修類稿張司
封宋太宗朝進

士仁宗景祐中出為兩浙運司名夏字伯起正史
作兵部郎由前為兵部郎也舊碑作張太常由後
嘉祐又有功而贈為太常少卿也宋祀典作工部
夏員外訛也俗呼司封以其有功授司封郎中也
其稱謂不
同如此

國朝雍正三年

勅封靜安公春秋致祭

安濟廟 錢塘縣志在馬坡街俗名祖廟祀宋安濟
公張夏初夏治潮患築石塘自六和埕至東青門
人德之立祠堤上今廟址正宋東青門外元始拓
入城內按宋東青門俗呼菜市門今名太平門與
清泰門相距里許今馬坡街在清泰門傍則是廟
或即舊時堤上所立後入城奉為土穀者也

范府君廟 仁和縣志在梅東高橋東相沿祀文正

公范仲淹

顯慶廟 錢塘縣志在風篁嶺祀宋郡守胡則當宋

仁宗朝再牧杭州有惠政退老西湖卒葬於此數
見靈異遂立廟祀

國朝雍正九年總督臣李衛重修

三忠廟 成化杭州府志在豐樂橋俗名三聖廟始
廟食於鳳翔府和尚原宣和間方臘寇睦討捕者

禱於神凱還奏聞始封為侯中興初屢以陰功助

順因建廟賜額曰旌忠

黃由旌忠觀記旌忠觀者為宋元豐三忠臣作也三

神世系以國史詳之高諱永能綏州人景諱思誼晉州人程諱博古河南人元豐五年有事於銀州三君同出戰死事聞朝贈其節賚卹休洽尋廟祀之初觀之立也實在清冷橋北隆興受禪上欲斥廟垣之地廣養親之宮乃撤浮圖覺苑寺易之嘉泰辛酉春省城不戒於火一夕宮館蕩為浮埃主觀陳元直慨悼成績先斥厥儲初得太師韓王請於朝賜內帑錢五百萬已而循和二王復與巨室之所向慕者益以金帛佐其役始事於是年之夏歷三歲而克成規模視前益侈

周元公祠 錢塘縣志在清波門外錢家灣祀宋濂

溪先生周惇頤

王光蘊謁濂溪先生祠詩先哲遺芳躅斯文得嗣音池蓮還在目虎

草亦知心四壁流文藻千峯結翠陰渚蘋秋可擷仰止意何深

國朝雍正九年總督

臣

李衛重建

二程夫子祠

杭州府志在吳山之麓祀先儒二程

子

協順廟

西湖游覽志在石塚其神陸圭昭慶軍人

宋宣和中引兵攻方臘敗之歿而為神紹興間海

濤衝激江岸神檄陰兵却潮潮勢遂平淳祐間江

潮衝激尤甚隨築隨圯神與三女揚旗空中浮石
江面以顯其靈岸賴以成浙西帥臣徐臬以聞於
朝賜廟額曰協順封神為廣陵侯三女為顯濟通

濟永濟夫人傍有小廟祀十二潮神各主一時

朱彝

尊謁廣陵侯廟詩并序錢塘江干有廣陵侯廟乙未三月展謁祠下按枚乘七發觀濤於廣陵之曲江世疑廣陵國為今揚州府治然元李錢思復試羅剎江賦證曲江即浙江楊廉夫避之時號曲江處士而曾子固撰越郡趙公救災記中有廣陵斗門合之伍子之山胥母之場疑義可析因賦絕句紀之昔聞江月松風客賦證錢塘是曲江不見郊闌廣陵廟靈風長拂舊旂幢

惠應廟 錢塘縣志在吳山至德觀右祀宋東京皮
場鎮土神張森神素事神農凡疹疾瘡瘍有禱輒
應宋政和間賜廟額封王爵南渡初移像至杭立
廟咸淳間加號明靈昭惠慈祐王

撒沙護國夫人廟 仁和縣志在阜亭山

胡世寧護國夫人廟

記神世居仁和裔出倪氏時值金兵充斥神尚屬
閨女避亂郊野飢寒迫切狼狽而殞里人憐其捐
軀守志瘞於阜亭之半山金人長驅南逐顯靈助
陣狂風大作向北揚沙金人目盡督宋兵鼓勇前
擊俘斬無算高宗即位首崇祀典勅封
撒沙護國顯應半山娘娘立廟塑像

忠烈廟 成化杭州府志在西湖北山棲霞嶺王姓

岳名飛初謚武穆寶慶二年改謚忠武元至正中
加謚保義明洪武四年稱宋少保鄂國武穆王萬
厯杭州府志景泰間請於朝賜春秋祀及忠烈額

宋史岳飛傳紹興七年秦檜主和飛言金人不可
信和好不可恃相臣謀國不臧檜銜之十年金人
攻鞏亳命飛馳援飛輕騎駐郾城烏珠兵逼飛奮
擊大破之進軍朱仙鎮自燕以南金號令不行飛
喜謂其部下曰直抵黃龍府與諸君痛飲耳方指
日渡河而檜欲割淮以北棄之乃先召張俊楊沂
中歸而後言飛孤軍不可久留乞令班師一日奉
十二金字牌飛憤惋泣下東向再拜曰十年之力

廢於一旦既歸十一年和議既次授樞密副使詔同張俊措置韓世忠軍俊欲與飛分其背覓軍飛義不肯曾檜捕世忠軍史景著以誣世忠飛馳書告以檜意俊密以告檜檜大怒風万俟卨劾飛罷樞柄又諭張俊劫王貴誘王俊誣告張憲謀還飛兵柄捕飛父子飛笑曰皇天后土可表此心何錡鞠之閱實無左驗改命万俟卨誣飛與憲書令虛聲探報以動朝廷雲與憲書令措置使還飛軍言其書已焚飛坐繫兩月歲暮獄不成檜手書小紙付獄即報飛死雲棄市籍家資徙家嶺南孝宗復飛官以禮改葬求其後名勝志廟貌恢特蓋忠官之建廟於鄂號忠烈

斥智果院為之兩廡刻其所製滿江紅詞併送張

紫巖北伐詩西偏有流芳亭石刻王像存焉

鄭元祐重

建精忠廟記故宋贈太師忠武岳鄂王起卒伍至
將相其謀審戰勝規模施設雖古名將不過是而
竟斃於權奸之手孝宗嗣位禮葬王父子於西湖
之北山菑廢智果觀音院賜額曰褒忠衍福寺錫
之田土命僧甲乙流傳主之宋亡寺廢不惟王墳
墓灑埽廢缺至於廟貌一切委地會隴西李君全
初以承事郎來為杭州路總管府經歷過王墓道
每瞻望徘徊時褒忠寺住持僧可觀等亦合辭累
請於君君遂以興復為己任市材鳩工前為廟門
翼以兩廡正寢中像王右像王之子左武大夫忠
州防禦使左像王之將龍神衛四廂都指揮使閔
州觀察使燕寢中像王父母衆王夫人咸在焉王
故五子忠州君既以侑食於正寢次任忠訓郎閔
門祇候贈武畧郎次任朝請大夫敷文閣待制贈
中奉大夫次任朝奉大夫提舉江南東路常平事
又其次任修武郎閔門祇候以及王之女號銀瓶

娘子并閬州君之夫人與夫王諸孫名位通顯者
皆肖像以祀焉王部曲諸將張憲烈文侯徐慶昌
文侯董先煥文侯牛臯輔文侯李寶崇文侯王貴
尚文侯李君懼廟祀之或缺有田一百餘畝歸之
廟為祔田廟既落成杭守上官一再致祭乃為叙
述其事胡銓弔岳太尉詩足馬吳江誰著鞭惟公
攘臂獨爭先張皇貔虎三千士搯挂乾坤十六年
堪恨臨淄功未就不知鍾室事何緣石頭城下聽
輿議萬姓顰眉亦可憐林景熙弔岳忠武詩寥落
一抔在英雄萬古冤孤忠懸白日遺恨寄中原樹
老殘霞淡塵深斷碣昏東南天半壁往事泣寒猿
于謙忠烈廟詩足馬南來渡浙河汴城宮闕遠差
我中興諸將誰降敵負國奸臣主議和黃葉古祠
寒雨積青山荒塚白雲多如何一別朱仙鎮不見
將軍奏
凱歌

國朝順治八年巡撫范承謨重修康熙二十一年兩淮
運使羅文瑜重建三十四年杭州知府李鐸重修
雍正九年鹽驛副使道江承炘重葺

忠烈二侯祠 萬厯杭州府志在衆安橋南衆木巷
祀宋封繼忠侯岳雲烈文侯張憲雲武穆之子憲
武穆部將武穆死於獄二侯就戮此地里人憐其
冤立祠祀之

忠祐廟 嘉靖浙江通志在岳武穆王故宅今按察

司治之左宋紹興三十年建王卒時有女尚幼抱
銀瓶赴井死附祭於此俗稱銀瓶娘子廟井在廟
東北明正德間按察使梁材築亭覆之榜曰孝娥

井

楊維禎銀瓶悲樂府岳家父國之憤秦家賊城
之傾皇天弗靈嗟我又與兄生不贖父死不如

無生千尺井一尺瓶瓶中之水精衛鳴王逢銀瓶
娘子祠詩碧梧月落烏號霜寒泉幽凝金井牀綺
疏光流大星墜夢驚萬里長城亡女郎報父收因
園匍匐將身贖無所官家聖明如漢主妾心愧死
緹縈女井臨交衢下通海海枯澗還井不改銀瓶
同沉意有在萬歲千秋露神彩魂今歸來風颯然
思陵無樹容啼鵲
阿爺墓木西湖邊

張烈文侯廟 嘉靖浙江通志在東山街口墓所祀

宋張憲景定二年追封烈文侯

唐皋張烈文侯祠記侯蜀之閬州人

武穆愛將或曰其壻也以功授閬州觀察使御前軍統制宣撫司副都統賊檜與張俊謀陷武穆執憲於鎮江榜掠無完膚卒無可証者遂遇害墓與祠俱在棲霞嶺西去武穆不遠百步許地曰東山街口正德丁丑創廟宇樹石坊於通衢榜曰宋張烈文侯祠

國朝康熙十年巡撫范承謨重建

資福廟 錢塘縣志在江干祀宋烈文侯張憲景定

二年建於忠壯鄉地方以侯得名

翊忠祠

杭州府志在忠烈祠神宇之西

名勝志以祀劉允升

施全者允升建州布衣間岳飛被逮上疏訟其冤秦檜大怒下棘寺論死全殿前司小校也憤檜賊忠誤國懷刃刺之不中磔於市云

靈衛廟

嘉靖浙江通志在錢塘門外祀宋錢塘令

朱蹕及尉曹將金勝祝威錢塘縣志皆建炎時死

完顏宗弼難者鄉人立祠署曰金祝二太尉廟

子鄭

文金祝二太尉廟記神姓金諱勝祝諱威同為錢塘尉曹總日建炎己酉烏珠闖兵於杭民避寇楮山城無禦備錢塘宰朱蹕鳩鄉丁僅二千赴餘杭邀擊陷陣而沒兩太尉集凋兵還據葛嶺編竹覆

泥為塗以禦翼日散騎廳至踣蹠而路仆者鱗疊
軍聲大振烏珠辟易數舍退赤山執居民為鄉導
得由南壁而入兩太尉猶力護西隅以寡制衆竟
歿王事鄉民具馬革駢墓陽雲洞之右因立祠於
死節之所今錢塘門側是也血食一境已踰百祀
四時賽祭居者蒙其祐病者禱而痊無疫癘無歲
災無橫嶢神所賜也十年賜廟額曰靈衛景定二年安撫洪

燾以神號請封金曰忠佐侯祝曰忠佑侯咸淳四
年士民請增蹕附廟封顯忠侯元末燬明洪武七
年重建宣德成化再經修葺弘治十二年鎮守太
監麥秀巡按御史鄧璋錢塘令吳道等重建萬厯

初縣令姜召增建後殿

顯功廟 咸淳臨安志在錢塘門外保叔塔下神姓

岳名据家於霍山為臨安府吏建炎初金人犯境

神輸家資募勇士三百人推錢唐尉曹將金祝二

人為首領迎敵死戰里人懷其功即四聖延祥觀

祠事之號保稷山王嘉定初建廟今處咸淳四年制詞朕惟

六飛南渡舉百二山河無一人敵王所憤每念為之撫然兩神克奮孤忠恤財募死士得二將率衆三百卒奪金人南下之威氣一境賴以安存今經百有餘年二將已都顯號而神獨無以旌其靈可

予哉進賜通侯宜
在以勞定國之典

廣福廟 萬厯杭州府志在鹽橋上祀宋蔣崇仁

湖西

游覽志崇仁仗義樂施倣常平法以家資糴穀賤
糶以救貧者其弟崇義崇信亦承兄志行之六七
十年里人立祠祀之咸淳初京尹潛說友請於朝
賜廟額曰廣福封崇仁孚順侯崇義孚惠侯崇信
孚佑
侯

靈應廟 成化杭州府志在小麥嶺下飲馬橋邊

湖西

游覽志其神蔣通質直孝親宋紹興十一年七月
坐化桐木下時騰曦熾烈七日如生累見靈異境
內賴之事間詔
為立廟崇祀

忠勇廟 咸淳臨安志在九里松神係統制張玘紹
興三十二年解海州圍用命戰歿贈容州觀察使
建廟海州其後又詔別建廟於臨安府行春橋之
側

洪忠宣公祠 錢塘縣志在葛嶺祀宋太師洪皓建
炎初使金不屈羈冷山十五年放歸賜第西湖葛
嶺遂建祠焉久圯

國朝雍正九年總督

臣

李衛重建

朱行人祠 錢塘縣志在九里松祀宋行人朱弁孫穀

通問副使朱公祠記宋祕閣朱公諱弁字子章婺源人副王倫使金留十七年頻死者屢矣送徽廟大行哀辭有曰嘆馬角之未生魂消雪窖攀龍辱而莫逮淚灑冰天高宗讀之感泣時以和議成與洪皓張邵俱歸卒葬錢塘九里松仙芝嶺下浮梁陳公大授來督兩浙學表彰忠義卜地普福寺北天醫院左構祠

楊和大王廟 舊浙江通志在方興神為楊沂中紹

興間賜名存中大小二百餘戰屢立奇功有墳在

馬杭州府志存中祖宗閔父震皆死難存中既顯請於朝宗閔謚忠介震謚忠毅賜廟曰顯宗曰

報忠

朱文公祠 杭州府志在孤山之陽明嘉靖四十四

年建祠錦塢山題額紫陽書院

張安茂為記并頌

國朝順治丁酉公裔孫以錦塢山峻歲久傾圯白於督撫陳應泰巡按王元曦督學谷應泰移建今處

張宣公祠 杭州府志在清波門外方家峪祀宋張

宣公南軒先生栳

吳太冲張宣公祠後記先生祠向在尉司下扇里其移方家峪

則萬厯甲辰始也太冲婦翁天與先生實先生二十世孫其猶子恐齋沆惕庵淳又重新之聶心湯

張宣公祠記南軒先生入侍經帷出臨藩臬忠誠格心巍然公輔之望蜀之縣竹版有專祠從忠獻公家武林而錢塘之祠則英廟初年禮垣具疏得旨建祠世廟時昌江曹學憲為之豎碑撰文十九世裔孫應選具牒郡邑移祠清波門外

忠節祠

嘉靖浙江通志在筆架山方家峪祀宋太

學生徐應鑣

呂本忠節祠記錢塘忠節祠祀宋太學生贈祕閣修撰謚忠節江山徐公

應鑣及其子琦崧女元娘者也公墓在方家峪向未有祠之者建祠賜額有司春秋致祭則自明弘治乙丑始正德丙子梁公材聿建祠宇迨今萬厯丙子又六十年錢唐令姜君召亟圖葺治中為堂三間祀忠節兩廡各三間子若女附追惟元兵壓境三宮北轅公太學生耳無一命之榮無專城之

寄乃毅然不辱率其子女
俱死井中是誠得死所矣

周宣靈王廟 仁和縣志在褚家堂廣豐倉側神姓

周名雄字仲偉杭之新城淶渚人以屢顯靈進封

王爵

錢養廉周宣靈王像贊并序王生於宋季銳志恢復抑鬱以歿其忠誠激烈固宜與日月

爭光矣碑載幻蛙事尤奇每歲三月四日傳王降
生之辰蛙於時倏來倏去光彩特異予所親睹豈
望帝之魂千載未泯耶至捍災禦患數著靈應里
人香火甚虔與褚僕射岳武穆相鼎峙余感其事
并系以贊辱如戰兮目如炬矯矯如龍兮桓桓如
虎大業未酬兮壯心獨苦寧死為厲兮毋生而為
鼠英風漠漠兮香雲楚楚享俎豆於
千秋兮永為我生靈恤災而禦侮

謹按周宣靈王周姓諱雄字仲偉杭之新城縣大平鄉淶渚人浙省是處立廟其在杭城者錢養廉序稱生於宋季銳志恢復抑鬱以歿其在新城者方回廟記止載歿後靈爽不言神生前事徐士晉碑記稱神賈於衢聞母病破浪而行為水所沒顯神於衢勅為江神其在衢州者志載肉身歛布加漆現今殖立廟中餘與徐記同至錢廣居建德縣神廟記則云初名雄後改名繆宣少授仙指失足墮水溯波而上香聞數十里因而建廟塑像於衢城之西詳觀諸記或稱孝或稱忠或稱仙顯不相作又方回記錢廣居記封爵年代亦各不符然現祀為江神其肉身又現在衢府廟中則為孝子無疑自應以徐記及衢志為正至稱忠稱仙或另一神諱雄諱繆宣或博會率合俱無確據今仍舊志備載各記於各府縣神廟之下以俟博考

馬塍廟錢塘縣志在溜水橋祀宋馬雄馬武世傳二

人東西居共為田園之塍故名

屠隆馬塍廟記城北隅有曰馬塍句

曲外史稱為散花灘處後為刼灰僅存雄武二王祠概而名之曰馬塍廟以虔上穀香火考二王為馬公雄馬公武有忠謀於宋而七尺同沉里氓婦豈無不稱說二王云

金龍四大王廟杭州府志在孝女北管下墟祀宋

謝緒

陳繼儒金龍四大王傳神姓謝諱緒以謝太后戚畹絕意仕進建武望雲亭於祖塋金龍山

之巔而隱焉甲戌八月大霖雨天目山崩緒泣曰天目主山也而灾若此宋其亡矣德祐二年正月帝遣楊應奎上傳國璽降表削去位號三月巴延趣帝及太后入覲獨太皇太后謝氏以病留臨安

忽元人從宮中昇其牀以出侍衛七十餘人同赴
燕緒大慟題詩二律書畢赴水死時苔水洶湧高
丈許狀若龍鬬緒尸逆流而上經旬不仆面目如
生遠近駭以為神附葬於祖塋金龍山之麓元末
鄉落皆夢緒為神曰黃河北流明年當有呂梁之
戰吾且提甲騎助之丙午春黃河果徙而北二月
元庫庫特穆爾遣騎將左丞相李二來寇時傳有
德守徐州將步騎二千餘沂舟呂梁舍舟陸戰戰
陳中見金甲神行空橫衆剌副將韓一於馬下此
神預夢助戰之驗也其後往來擁護漕河猝呼猝
應或舟膠拔之淤泥壅塞之下或舟覆脫之風濤
巖險之中輓卒販商南北往來於祠門者惟神是
恃合手稱金
龍四大王馬

國朝順治二年

勅封顯佑通濟金龍四大王之神

淮安忠武王祠 成化杭州府志在前洋街祀元水

相巴延元貞元年建

劉敏中淮安忠武王廟碑世祖恢崇丕緒一時心腹永牙

之寄宣勞戮力皆極其選至於出入將帥動協廟謨越長江假全宋致有元之盛而成不世之功者曰惟忠武王爾上之居儲闈也避王功烈俾廟於抗始嗣位勅以公帑十萬緡成之且勒碑焉而其辭命臣敏中撰述

謹按王諱巴延朔方人至元初以宗王命入奏世祖一與語異之輒留置左右弗遣未幾拜光祿大夫中書左丞相七年同知樞密院事十一年再為左丞相廷議以宋恃險拘我信使資我叛臣詔王

昔曹彬以不殺平江南今以大師畀汝汝為曹彬可也王拜命啟行不至其家是年十二月渡江明年五月被召入見具陳始終規畫七月拜中書右丞相八月還南明年正月宋降拜金紫光祿大夫知樞密院事進開府儀同三司太傅錄軍國重事春秋五十有九以疾薨於京師進封淮安王謚曰武忠

晏公廟 萬厯杭州府志在武林門北夾城巷內祀元晏戍仔戍仔江西清江鎮人元初輸文錦於上都因而尸解人以為神立祠祀之後顯靈江湖間洪武初封平浪侯二十三年浙江都指揮諸傑以

督漕獲庇捐建今祠

總管廟 在清波門流福溝祀金元七總管之神神
為水神廟始建不可考

國朝雍正七年里人王森等感其靈異改向重建

嚴指揮祠 成化杭州府志在最樂坊神姓嚴名德
字君輔當塗采石人洪武元年統軍取台州力戰
死追贈驃騎上將軍副大都督府事上護軍天水
郡公勅有司建祠俾其子孫崇祀焉

懷忠祠 萬厯杭州府志在錢塘學宮之東改清軍

公館為之祀明建文間死事諸臣

呂本懷忠祠記
侍御蕭君原按

浙檄所司覈實祠祀在寧海則有文學博士方孝
弼太常少卿盧原質在瑞安則有戶部侍郎卓敬
在奉化則有左拾遺戴德彝在仙居則有戶部侍
郎盧迥蕭縣知縣鄭恕在山陰則有都御史陳性
善在黃巖則有翰林修撰王叔英在青田則有谷
府長史劉璟在桐鄉則有江西副使程本立在義
烏則有都給事中龔泰在臨海則有東平州吏目
鄭華此十二人者俱所謂忠於所事有死無二者
至如翊忠翊義則寧海御史鄭公智僉事林嘉猷
斯皆兩浙之產正氣攸鍾侍御疏請建祠會城春
秋秩祀額曰懷忠若夫王叔英鄭恕之妻死其夫
子死其父一門全節世所尤難附祀祠中亦足以

樹閭內之
風聲矣

國朝康熙五十八年舉人潘兆新原生范玉鈐等因齟
使差滿常假館其中木主散失籲請整飭舊祠俎

豆勿替

忠節祠 萬厯杭州府志在按察司署內左偏祀浙

江按察使王良

傳詳名宦劉瑞忠節祠記歲壬午
浙江按察使王公良闔室自焚實

太宗續緒之年蓋百二十載矣西蜀劉瑞董學於
浙知公死事搜慨白於今按察使梁材設主祠公

榜曰忠節正德戊寅
秋九月十一日也

茶槽廟 仁和縣志在會城東當錢塘盡界沿江七

十里北至臯亭山屢受潮患明永樂間茶商陳旭
出索金築塘不成遂躍身入潮沙隨屍而漲塘乃
成勅封茶槽土地興福明王迄今久無潮患士民
戴德爭奉其神有上新中新下新等祠

褒忠祠 錢塘縣志在瑪瑙寺左祀明監察御史夏
誠誠殉土木之難舊有像附揚清祠有司以揚清
非公妥神之所裔孫夏時登移像專祠

旌功祠 萬厯杭州府志在三台山祀明少保兵部

尚書贈太傅謚肅愍于謙西湖游覽志弘治中賜

謚肅愍表祠曰旌功有司春秋致祭萬厯十八年

改謚忠肅

張鑑旌功祠記正統間國家有土木之變而旋克底定少保兵部尚書于公之

功也無何以讒死天下哀之杭人即公南新街故宅為位奠哭而歲時拜謁焉既而詔復公官遣祀

而誄以文曰謙之忠予憐之於是杭人呼南新故宅曰憐忠祠故帝嗣位贈官賜謚曰予旌乃功

秩服祀於是有所始即三台山墓下建旌功祠歲春秋祀公與武穆皆墓於杭人皆祠焉三台去按

霞南北對峙穹祠顯號輝赫湖山之上皆亦天定云邱甯于少保祠詩祠前春霧隱緋袍隔岸松聲

應海濤伯紀空勤恢復計子儀還重廊清勞我陳
薄奠卿三獻誰作長歌當一號西望岳墳纔數里
白雲湖上兩峯高朱彞尊于忠肅祠詩昔在狼山
下軍書犯近垌六師輕朔漠萬騎失雷霆土木塵
長滿龍蛇歲不寧豆田沙浩浩泰谷路冥冥濟世
須元老長材總四溟從容持國計指顧悉兵形瑕
呂安羣議劉琨表外廷嗣王仍歷數高廟有神靈
既罷金縢歎無煩白馬刑北轅旋萃輦南內啟朱
扃命已甘刀鑊功真溢鼎銘春秋隆代祀俎豆肅
維馨一自輅車至難期煥火停遺墟悲戰伐大樹
日飄零碧草空祠長黃鸝過客聽霜鐘沉曉月風
牖繞明星下壺誰修墓巫陽數降庭識還思雨帝
碑欲墮江亭遠水澄湖碧流雲暗
壑青千年華表鶴哀怨此重經

同仁祠 萬厯杭州府志在武林坊祀巡撫江西都

御史謚忠烈餘姚孫燧兵部尚書謚端敏前江西

按察副使仁和胡世寧新建伯巡撫江西都御史

謚文成餘姚王守仁

唐龍同仁祠記同仁祠御史周汝員所建也三公皆我浙

產後先奮忠協平宸濠之亂以死勤事捍大患法皆得祀功在江西而浙輔車之地竊被其休故祀之况鄉先生沒而祭於社抑亦禮乎經始於嘉靖丁酉十一月戊戌三月乃考成馬位以齒叙從鄉也食以功合以義起也歲一祭祭每以六月十四日濠以是日舉兵孫公死之故以是日也合食一堂連輝千祀瞻仰俎豆能不肅肅於衷乎

勲賢祠

杭州府志舊名天真精舍在天龍寺之左

祀明王守仁以徐愛冀元亨薛侃鄒守益歐陽德

王艮王臣劉魁錢德洪王畿蕭廩陳善配享

蕭廩
勲賢

祠記萬歷七年天真精舍燬陽明先生祠產沒入官後五年蒙恩復祠產先是撫臣廩按臣鳴謙上言浙省故臣若基若謙若懋或以功祠或以德祠亦或有以賜額祠者守仁之功視基視謙無愧其學視懋且有光宜有特祠以垂永久於是賜額勲賢湛若水天真精舍詩迺迺訪天真歷歷登斯堂灑落南高峰睨臨錢塘地位高且深如道不可量哲人久已逝山水空遺光龜峙列方位顯設大文章平生未一試千載悵相望我來生感慨久要不可忘陳詞之不足繼以奠心香

發祥祠 萬歷杭州府志在南屏山西麓祀昌化伯

邵林以誕生孝惠太皇太后也嘉靖十八年建祠
墓下賜今額

褒忠祠 萬厯杭州府志一在棲霞嶺西祀明杭州
前衛指揮陳善道吳懋宣冠帶總旗張儒海寧衛
指揮滿朝采煉馬呈圖千戶王繼隆百戶康綬楊
臣王相姚岑呂鳳姜楫海門衛立功指揮俞亨昌
國衛百戶陳爵陳表三江巡檢張杲鐵場巡檢喬
仲厚平湖縣典史喬登皆以倭變陣亡海寧衛赭

山長沙灣等處嘉靖三十二年巡按御史趙炳然
請於朝祠祀一在棲霞嶺東改鳳林寺為之祀明
遊擊將軍宗禮都指揮邵昇指揮僉事姚泓贈指
揮僉事干岳皆以倭變陣亡柘林三里橋等處嘉
靖三十七年總督都御史胡宗憲請於朝建祠春
秋致祭

揚清祠 萬厯杭州府志在忠清里祀四川按察僉

事王琦刑部郎中項麒

陳一貫揚清祠記王諱琦由鄉進士為按察僉事致

仕貧甚寒餓卒項諱麒亦鄉進士改南京刑部郎中乞歸饋糜僅餬口闔戶歌吟允然有得初唐忠臣褚太傅遂良杭人也二公實繼產太傅里因表其里曰忠清并祀二公於太傅之旁嘉靖二十年予從弟仕賢為杭守別建一祠然制頗陋不稱予遠繼守府得近坊疑真庵迎神祀於中改題曰揚清用別諸太傅也

報功祠 萬厯杭州府志在忠慶巷內祀巡撫浙直江福少保兵部尚書胡宗憲

阮公祠 杭州府志在武林門外祀明都御史阮鶚扁額忠定隆慶六年建

國朝雍正八年總督

臣李衛重葺

李衛重修阮公忠定祠記余自丙午奉

命撫

浙於地方利弊既已次第興剔因取境內志乘所載列於祀典諸祠宇按籍而稽檄行所司春秋時饗各增其額而忠定阮公之裔首以修復先祠為請按公當前明嘉靖間以名進士視學浙江所拔多寒畯時倭寇肆掠大掠嘉禾屬邑之民率其孥以趨杭而賊方窺城城門晝閉環堞而號者以數萬計公提勁旅禦之於北塹啟外闌以入民賊憚公威聲尋亦逡巡避去是公之大有造於杭也邇時賊復至勢張甚瀕海諸邑咸被蹂躪而總制某欲得賊魁使賊并力敵公困於桐鄉者匝月當是時公幾不免然某以賊勢既分從容設方畧以誘賊戮其魁桐鄉之圍亦解是殲賊者某之功而使賊之得以就殲者公之力也海氛既靖塗巷室廬依然無恙杭人德公不忘於武林門外崇室祀公

興化李文定公既為之記迄今百數十年風雨漂搖堂寢頽廢行道之人幾弗知有公也者夫以公之功德如此修舉廢墮固有司事也表彰前勲風勵名節亦封疆之責也爰飭錢塘令鵬工庀材凡棟之撓者瓦之解者垣級之傾圯者以及丹雘采璲之漫漶不新者咸為治之經始於己酉之季春落成於是年九月之杪其裔復請余文以記之余惟公生平文章經濟德業事功昭昭史冊有歷百世而逾新者固不係乎祠之有無也然聞之傳曰有舉莫廢今公之子孫式微無能光啟遺蹟使逆聽其湮沒將不數年而一椽尺土鮮有存者前哲靈爽式憑之區一旦委諸荒烟蔓草間揆之昔人報應酬庸之心毋乃或戾乎方今聖天子褒忠錄節闡幽表微凡殊世賢哲未入廟食與近代孝子順孫義夫節婦皆得與於旌揚之盛典如公大節昭著而祖豆不修胾饌無所又

何以仰副
大化而無愧於風勵之旨耶後之有事茲土者尚其嗣

而葺之

龐公祠 萬厯錢塘縣志在鳳林寺右祀明御史龐

尚鵬

張瀚龐公祠記南海龐公才具英達按部時進三老具言困苦公檄所屬均歛於民豪家

無得脫免而民不重困號曰均平冊仍疏於朝請著為令蓋公所建即宋人催役遺意而抑橫徵寬民力其德於浙人甚鉅今去浙三十餘年歌思彌切專祠於西湖之陽誰曰不宜

甘公祠 杭州府志在芝松里虎林書院之陽祀明

浙江巡撫甘仕爝以陳善配萬厯三十七年建

姚公祠 舊浙江通志在城隍廟儀門東祀明郡守
姚之蘭舊名德馨祠城隍廟志其西為金公祠祀
明郡人福建巡撫金學曾

邵弘毅祠 錢塘縣志初在玉泉山後徙靈鷲山祀
明員外郎邵經邦萬厯初建 經邦仁和縣人以
言事廷杖謫戍著有宏道宏簡

閩

事白里人

公請從祀鄉賢立坊於城內曰麟翔鳳彩其後人
皆能世其家業有聞於時公仲子穆生復以靈鷲

山別業改建專祠奉木主於內春秋祭焉

李文襄公祠 在西湖葛嶺之陂祀

國朝文華殿大學士吏部尚書前浙江總督李之芳雍

正八年總督臣李衛以廢祠改建

范公祠 杭州府志在孤山之麓即四賢堂舊址祀

國朝浙江巡撫都御史范承謨傳詳名宦以其友嵇永仁王

龍光沈上章林能任四人從祀皆從死耿逆之難

者歲給錢塘學租銀八兩以備祭祀李之粹范公祠記孤山之

麓自林處士妻梅子鶴後至今數百餘載月冷梅荒憑弔遺踪者每有撫今追昔之感忠貞范公以中丞撫浙時即其故址構亭補梅聿復舊觀慕先賢之芳躅續久廢之勝遊繼奉簡命總督七閩乃值逆藩猖亂肆虐忠貞全家殉難浙人慕德興悲乃立祠於放鶴亭則益亦羊公之墮淚碑矣

王公祠 錢塘縣志在藕花居即湖山書院祀

國朝巡撫都御史王國安

敬一祠 錢塘縣志在孤山四賢祠側祀

國朝巡撫都御史趙士麟

吞金祠 錢塘縣志在葛嶺即吳錫妻戴烈婦墓所

建

諾公祠 錢塘縣志在鳳林寺左祀

國朝鎮浙將軍諾羅布內有君子泉敦詩說禮堂

忠義節孝祠

國朝雍正元年九月初五日欽奉

恩詔內開一旌表節義給銀建坊民間往往視為具文
未曾建立恐日久仍至湮沒不能使民間有所觀感
着於地方公所設立祠宇將前後忠孝節義之人俱

標姓氏於其中已故者則設牌面於祠中祭祀用以
闡幽光而垂永久着該部議奏欽此隨經部議欽遵
各府州縣俱建立忠孝節義祠男祠設石碑一座
女祠設石牌坊一座鐫列姓名用垂永久錢塘仁
和二縣忠義祠在本縣學宮內節孝祠俱在吳山
下知縣楊夢琰胡作柄奉文建

賢良祠 在杭州府學內仁和學西首

國朝雍正十年二月初五日奉

上諭我朝從前文武大臣持躬正直奉職公忠樹績建
勲全名全節者朕已降旨於京師建立賢良祠永遠
展祀以彰令善因思外任大臣鎮撫封疆宣猷布化
忠勇効命威愛宜民其政績卓然可紀者身故之後
若於本地建立賢良祠俾得永膺祀典既足慰兵民
懿好之公亦足為後來居官者之勸如近日之將軍
蔡良提督張起雲總兵蘇大有魏蒨國皆素有賢聲
勤勞王事而歿於官者允宜在賢良祠之列著直省

各於省會之地建立祠宇其與祀之人若追溯從前
恐稽查未確致滋濫膺亦未可定不若即從近年為
始向後若有應請入祠者該地方官督撫於一人各
具一本請旨不必彙奏其一切事宜着九卿妥議具
奏特諭欽此九卿議覆應令該督撫於各省城建立
祠宇將蔡良張起雲蘇大有魏蒨國四員先行製
牌入祠永膺祀典以作楷模其近年各省督撫將
軍提鎮等大臣有政績卓然可紀及此後外任文

武諸大臣著有賢名於身後應請入祠者詳查事實博採公評一人各具一本據實繕奏恭請

欽定一體入祠致祭其祠宇正廳三間廳內正中製造神龕一座遇有應行入祠之大臣製造牌位安設廳前東立石碑一座西設燎爐一座二門樓一間大門三間大門內東西值房各一間大門外柵欄一道照牆一座工料等費俱於公項內動支工完造冊報部查核每年春秋二祭照各省名宦祠之

例令該地方官備辦入於祭祀銀兩內開銷所建
祠宇應請

欽題賢良祠扁額恭摹刊刻懸掛以光大典以垂萬年
奉

旨依議欽此欽遵檄行仁和錢塘二縣擇地建興動支
工料銀五百九十九兩於仁和縣學之西如式建

造雍正十三年總督銜管浙江巡撫事


臣

程元章

以前任浙江總督陞文華殿大學士兵部尚書諡

文襄李之芳又前任浙江巡撫陞戶部尚書謚恭
毅趙申喬各具一疏題請入祠致祭經部議以應
如所題覆奏奉

旨依議



浙江通志卷二百十七